

DOMENIE XV «VIE PAL AN»

Antifone di jentrade Sal 16,15

Jo te justizie o vuei podê cjalâ la tô muse,
cuant che mi dismôf, o vuei saciâmi dome cul cjalâti.

Colete

Diu, che tu ur mostris ai straviâts la lûs de tô veretât
par che a puedin tornâ in strade,
dâur a ducj chei che si professin cristians
di rifudâ dut ce che al contraste cun chest non
e di tignî ce che al è convenient.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Dt 30,10-14

La peraule e je propit dongje di te, par che tu le metis in vore.

Dal libri dal Deuteronomi

Mosè al fevelà al popul disint: «Tu ubidissarâs a la vôs dal Signôr to Diu metint in vore i siei comants e i siei ordins, metûts jù tal libri di cheste leç, tu tornarâs là dal Signôr to Diu cun dut il to cûr e cun dute la tô anime.

Viôt che la leç che ti ordeni vuê no je masse grivie ni masse alte par te. No je mo tai cîi, che tu scuegnis dî: Cui laraial sù tai cîi a cirînuse, in mût che o podin scoltâle e metile in vore? E nancje no je di là dal mâr, che tu scuegnis dî: Cui laraial di là dal mâr a cirînuse, in mût che o podin scoltâle e metile in vore? La peraule e je propit dongje di te; e je te tô bocje e tal to cûr, par che tu le metis in vore».

Peraule di Diu.

SALM RESPONSORIÂL dal Salm 18

R. I tiei judizis, Signôr, a son la nestre gjonde.

La leç dal Signôr e je perfete, e rinfuarce l'anime.

La testimoneance dal Signôr no mole:
ur dà sintiment ai piçui. R.

I comandaments dal Signôr a son robe juste:

a jemplin il cûr di gjonde.

L'ordin dal Signôr al è splendit:

ur dà lusôr ai vôi. R.

La peraule dal Signôr e je monde e e dure par simpri:
i judizis dal Signôr a son vêrs e juscj dal prin al ultin;
plui che no l'aur a valin,
plui che no un disordin di aur dal plui rût;
a son plui dolç che no la mîl e di un pietin che al gote. R.

SECONDE LETURE Col 1,15-20

Midiant di lui e par lui dutis lis robis a son stadis creadis.

De letare di san Pauli apuestul ai Colossês

Crist Jesù al è il litrat dal Diu invisibil,

il Fi primarûl di dute la creazion,

parcè che in lui

a son stadis creadis dutis lis robis

tai cîi e su la tiere,
chês visibilis e chês invisibilis:
Tronos, Dominazions,
Principâts e Potencis.
Dutis lis robis a son stadis creadis
miant di lui e par lui;
e lui al esist prin di ducj lôr
e ducj a stan sù in lui.
Lui al è ancje il cjâf dal cuarp, ven a stâi de Glesie;
lui al è il principi, il Fi primarûl
dai risussitâts,
in mût di jessi il prin in dut,
parcè che in lui e à vût gust
di stâ dute la plenece
e di riconciliâsi, miant di lui, dutis lis robis
de tiere e dal cîl, fasint la pâs
miant dal sanc de sô crôs.
Peraule di Diu.

CJANT AL VANZELI cf. Zn 13,34

R. Aleluia, aleluia.

Us doi un comandament gnûf, al dîs il Signôr:
che si voledis ben un cul altri,
come che ancje jo us ài volût ben a vualtris.

R. Aleluia.

VANZELI Lc 10,25-37

Cui isal il gno prossim?

Dal vanzeli seont Luche

In chê volte, un dotôr de leç, volint meti Jesù a lis provis, al jevà sù e i disè: «Mestri, ce aio di fâ par vê la vite eterne?». Jesù i rispuindè: «Ce isal scrit inte Leç? Ce leistu?». Chel om i disè: «Tu amarâs il Signôr, to Diu, cun dut il to cûr, cun dute la tô anime, cun dutis lis tôs fuarcis e cun dut il to sintiment e il to prossim come te in persone». Jesù i disè: «Tu âs rispuindût ben; fâs cussì e tu vivarâs».

Ma il dotôr de leç, volint cjatâ fûr une reson, i disè a Jesù: «Ma cui isal il gno prossim?». Jesù i rispuindè: «Un om al vignive jù di Jerusalem a Jeric, cuant che si intivà tai brigants che i puartarin vie dut, lu pestarin e po si 'nt lerin lassantlu li plui di là che di ca. Par cumbinazion al passà par li un predi, al viodè l'om ferît e al lè dret, di chê altre bande de strade. Ancje un levit al passà di li; ancje lui lu viodè e, passant par dongje di lui, al lè pai siei viaç. Invezit un Samaritan che al jere in viaç i passà dongje, lu viodè e al sinti dûl di lui. Si sbassà sore di lui, al strucjà vuela e vin su lis sôs feridis e jes fassà. Po lu cjamà sul so mus, lu puartà te locande e al fasè dut il pussibil par judâlu. Tal indoman, al tirà fûr doi denârs, jai dè al ustîr e i disè: Viôt di lui e ce che tu spindarâs in plui tal rifondarai cuant che o torni indaûr. Cui di chescj trê ti parial che al sedi stât il prossim di chel che si jere intivât tai brigants?». Il dotôr de leç i rispuindè: «Chel che al sinti dûl di lui». Alore Jesù i disè: «Va e fâs ancje tu compagn».

Peraule dal Signôr.

Su lis ufiertis

Cjale, Signôr, i regâi de tô Glesie in preiere
e dàur la gracie a di chei che ju ricevin
di cressi inte santitât e inte fede.
Par Crist nestri Signôr.

Antifone a la comunion Sal 83,4-5

Ancje la passare e cjate une cjase
e il so nît la cisile dulà poiâ i siei piçui,
dongje dai tiei altârs,
Signôr des schiriis, gno Re e gno Diu!
Furtunâts chei che a vivin inte tô cjase:
a puedin cjantâ lis tôs laudis cence polse.

Daspò de comunion

Daspò di vê ricevût il to regâl, ti prein, Signôr,
che, celebrant dispès i tiei misteris,
e cressi in nô ancje la vore de tô salvece.
Par Crist nestri Signôr.